

# «Vesair il mund cun las ureglias»

Nov program da Radio Rumantsch

■ (anr/fa) «Taidlas bler – vesas cler», sut quel motto ha Radio-televisiun Svizra Rumantscha RTR concepì da nov ses program da radio. En avegnir dat il Radio Rumantsch anc dapli pais al pled. Ils programs da radio da las emprimas chadainas da mediums publics, sco quai che RTR è in, èn vegnids creads al cumenzament dals onns 80. «Da quel temp purschevan ils programs da radio in mix d'in zic infurmaziun, in zic musica ed in pau moderaziun», ha declerà *Mariano Tschuor*, il directur dad RTR glindesdi a Cuira als representants dals meds da massa. Entant s'ha la situaziun però midada: «L'actualitad pon ins oz retschaiver grazia als novs apparats dapertut ed immediatamain, perquai vulain nus returnar tar l'origin dal radio, il pled.» Trais giadas al di stat l'actualitad en il center dal nov program dal Radio Rumantsch (RR): A bunura da las 6 fin las 9, a mezdi da las 11 fin las 12.30 e la saira da las 17.00 a las 19.00.

## RR daventa in radio narrativ-discursiv

«Las novitads na vegnan betg mo annunziadas, ils uschenumnads fatgs durs vegnan era rendids chapibels cun l'analisi schurnalistica», ha cuntinuà Tschuor. Quai vegn a far il RR a partir da proxim glindesdi cun discurs dond paisa al dialog: En discurs cun perditgas, cun persunas intretschadas,

emprovan moderaturas e moderaturs da situar fatgs e persunas. «Questa furma narrativa en sias differentas variantas duai gidar ad enclerger la complexitad d'in tema», en il mund medial d'ozendi daventa l'analisi tenor el adina pli impurtanta. Il public en mira èn persunas en la vegliadetgna da trenta onns e dapli: «Quai è stada ina dumonda delicata, nus essan dentant da l'avis che l'interess dal public giuven pudain nus svegliar meglier via auters mediums sco p. ex. cun l'internet, e betg cun il RR», ha ditg Mariano Tschuor.

## Radionovellas ed autras emissiuns novas

Tant en las contribuziuns da l'actualitad ed en las emissiuns da magazin sco er en emissiuns da pled in summa ha il pled dapli paisa. *Gian Ramming*, il schefredactor dad RTR, ha preschentà ils midaments e las novitads: «Schlargiadas e piazzadas da nov èn vegnidas las emissiuns sco p. ex. 'Vita e cretta' la dumengia da las 8 fin las 9, l'emissiun 'Marella' la dumengia da las 11 a las 12 u il 'Profil' che preschenta ina persuna la sonda da las 11 a las 12.» Nova è sco ch'el ha menziunà la «Radionovela», ina soap concepida sco seria e programmada mintga di d'avantmezdi. La nova emissiun «Famus e glorius» quinta als interessads las aventuras da las persunas renumadas e ritgas. L'emissiun da discussiun «Pala-

dus schurnalists discussiun-schan il tema da l'emna ed il magazin cultural sonda a las 10.00 èn ulteriuras emissiuns nua ch'il pled stat en il center. Las emissiuns sco il «Concert sin giavisch» u las «Gratulaziuns» èn tenor Ramming emissiuns dal program existent che han success, perquai fan ellas part era dal nov program da RR. Er il program da musica è vegnì parzialmain renovà. En ils binaris d'actualitad predomineschan hits ed evergreens, en il program accompagnant han spazi era truvaglias e titels main enconuschents. «Per tut il program vali, a la musica rumantscha vegni dà anc dapli pais», ha ditg il schefredactor.

## Placats mits sa transmidean en raquintaders

La nova campagna dad RTR lavura cun meds tecnics ils pli moderns: Sin ils placats èn stampads codes spezial. Sch'ins fotografescha in da quests codes R cun il smartphone, alura retschaiva l'utilisader in podcast audio cun las infurmaziuns da basa tar il tema numnà sin il placat. Uschia daventa ina surfatscha da reclama mitta tut en ina giada in med acustic infurmativ, sco quai ch'il nov program da RR raquinta istorgias che duessan far avrir ils eglis. Cun quest princip èn vegnids creads placats cun divers sujets che pledan, ma er inserats, flyers, brochuras e schizunt ina fatschada da la chasa RTR a Cuira



Gaby Degonda, Mariano Tschuor e Tobia Valär cun in dals placats mits che san discurren.